

涇陽縣志

卷八

御

地
170.71
34.43
26

孝婦

明楊氏生員秦甲禮妻生員楊榜女割股療母督學旌之

呂氏生員韓鍾秀妻姑劉氏疾危烹股肉以救知縣路公旌其門

安氏生員宗子緝妻爲女時母鄒氏病疫藥罔效氏割臂肉和藥進次日再割昏暈幾死母病以愈適宗門翁姑先逝不服綵茹葷追服三年緝歿後家計益落艱辛教子興宗爲博士弟子員

邢氏焦期遠妻年十六歸焦孀姑失明氏手爲梳櫛飲食必親奉後十五年期遠歿撫十歲子晝耕夜績以給俯仰鄉里稱節孝云

王氏原任重慶通判降改黃州經歷劉焯妻夙嫻婦職焯歷官

涇陽縣志卷八

氏以姑老不能就養身未嘗入官署後焯久宦遊氏獨任甘旨遇辛未荒脫珥剪髮供養膳姑疾篤親嘗藥餌巾褰廁諭必自浣滌每夜焚香告天祈以身代歿則極哀盡禮

任緣妻毛氏年十八歲夫亡事翁姑孝氏無所出撫弟任秉謙子繼夫嗣後秉謙亡遺妻楊氏因氏孝事舅姑苦志守節亦誓不再嫁鄉里推爲一門賢孝雙節云

王氏貢生劉烜妻姑亡遺子僅三月餘氏乳哺必先叔後子繼姑病疫四十餘日家人懼其傳染避之氏同夫日夜侍側衣不解帶初烜常苦束修不足供旨甘氏脫簪珥積紡績以佐養略不爲子女饑寒計

李氏生員王元理妻年十六父病善奉湯藥歸元理孝事繼姑卒年二十四

王氏呂見龍妻于歸後卽遭翁喪不克事舅而奉姑盡道夫外出值姑病藥餌罔效氏割左臂股肉暗入湯藥姑服之云此藥覺有異味病卽痊此事惟幼女祥姐見之氏囑勿言見龍歸笥中見血衣詢之祥姐始悉閱氏臂刀痕尚在鄉里聞之無不驚異姑以壽終氏現年六十歲

按孝友爲德行所重宦業隱逸中已數數見茲專紀其實使知崇本也而爲人子婦無異爲人子例得並書若夫賢母則附載以垂範云爾

義行

義行魏公彙入人物志未甚分別前志特著義俠一科謂以世風不古大半鄙吝柔脆惟舉好施禦亂者誌之庶有補懦立頑廉之義後志又按史游俠傳多刺客姦人不可訓俗謂以義行爲正使民以義惠在其中矣制行以義仁在其中矣一簞之食係乎生死半臂之力關乎存亡彼夫揮金散粟濟人緩急其義固未可少也故博採而續之以勸夫好義者今仍之而兼綴數人於後

明

趙敬以例授散官歲旱出粟數百石賑濟見暴骨輒擇地葬之人有疾施之以藥孫勉永樂甲午舉人元成化丙午舉人

曹儼弟恪正統間值歲凶各出粟千石賑濟奉勅旌表

張敏富好施予嘗出粟千石助賑奉勅旌表

蹇賢宏治甲子舉人容城縣知縣少時授徒王好善家有隣女叩門求苟合拒之不納次晨以他故辭主人去宦歸避暑別室隣人潛至其家盜取八百金僕欲舉首賢不可曰貧富數也我

今日比做秀才何如首之官恐傷性命賊伐渠樹百餘株被獲
隨釋去念賊今午定不能舉火不然何不黑夜竊取而白晝如
此乎并以其樹遺之歲旱讓水同畔以濟窮民有越水程者心
甚恐賢婉言慰之且令其再使無妨也父死不離墓媳瞽不易
親行誼俱不可及

馬瑄字允莊宏治間以監生授吳江縣縣丞嘗郊行得遺金坐
以待頃一人號泣至爲言賣女得此養老母卽與之復周以粟
所著有五經正義四書中說性理發微通鑑管見諸書

姚玉璽字信宇萬歷乙卯武舉甘州右營遊擊親故不能葬者
捐貲買棺卜地歲饑出粟賑濟鄉鄰被德焉

趙思齊字心印萬歷戊午舉人有文武才善於六壬握奇時賊
寇橫起練土著築鎮堡里人賴之崇貞庚辰歲大祲發粟賑濟
多所全活子九成天啟丁卯舉人

王者佐字柱玉萬歷癸卯舉人涿州知州有閩人黃賓卿被劫
泣欲死佐憫之賙以二百金又有韓霖負貸五百金因霖客死
遠鄉竟焚其券壽八十餘而終

張鳳苞字美寰以例授鴻臚寺序班家素封散財賑饑里黨皆
頌其德壽七十而終

劉永安出粟助賑給冠帶僉事王公表其墓

邢大信字順甫號太乙萬歷間歲貢莊浪衛教授性好施每遇
鄉鄰有貧者捐貲濟之年九十二作遊仙詩云青鳥倏而至慙
慙前致辭歸來太乙子桃熟已多時無疾而終德報洵不爽云
所著有考古編力學集詩賦論傳序銘諸書子祥順治丙戌舉
人

巢帝閣生員道拾遺金五十兩坐待一日還原主及暮歸路臨高崖所乘驢忽驚走里許而崖遂崩人以為陰騭之報也子于科順治辛卯舉人

任紹曾字子述監生天啟間歲饑輸百金賑濟有貧不能償貸者每焚其券家業以是中落子璣順治辛丑進士

陳繼泰字憲字崇貞癸酉舉人都察院司務慷慨慕義少年多遠略崇貞己巳賊亂破產糾義旅數出奇勝之賊始遁去閩里

侍以安堵有詩見藝文

李亨勇敢多力崇貞己巳憤賊亂自請從軍所殺傷甚衆值羣卒潰散獨奮身入賊營被害邑里為感泣焉有詩見藝文

秦光祖少習騎射崇貞己巳賊至仗劍從戎為流矢所中猶力戰不已竟死於賊有詩見藝文

趙友梧字鳳喈崇貞間歲貢時羣盜蠢起友梧率雲陽鎮居民守堡練兵與賊戰屢多斬獲賊攻城五日不能下計詘夜遁後以奸人內應城陷死之

王祚丕字念茲生員崇貞甲戌流寇入境祚丕奮不顧身率衆鄉勇戰於王六十橋手刃數賊為流矢所中而歿一時府縣督學共扁其門

王烈字丕承崇貞丁丑武進士商雒道中軍守備癸未歲逆闖入關烈守城禦敵相拒二十一日援兵不至城陷被執罵賊死之撫院賈公立碑旌獎

趙九筵賊至堡下衆皆懼筵鼓力捍禦賊屢登陴筵屢拒之身中矢死鄉人憫其義建祠祀焉

牛象燭字汝華生員賊至逼其下樓堅不肯屈樓焚蹈火死士

人哀之

王璉家故充漢中戎役值寇警父當往役璉年少代父往見知於都司委理兵務終事而還成化時邊役煩興軍需不足璉與兄翺各輸金六百兩助餉恩賜七品冠帶嘉靖間翺子莊以紫陽歲貢徵爲登仕郎璉子卿以例監授省祭官

李進生員李儒曾孫也值闖變進同兄選弟遇率鄉人固守永寧堡勢窮賊入進具衣冠端坐土地祠中賊脅以刃乃罵曰我秀才豈肯降賊遂與選遇俱被害 姜堯相例貢生流寇掠村舍堯相憤詣賊營諭以大義賊繫之堯相大罵曰若曹爲逆當菹醢我八十老人寧畏死耶遂遇害

本朝

張瑋生員學行兼優邑侯趙公延爲子師後趙陞蜀臬請至署

有同邑王者佐業商成都爲仇陷擬死瑋知其冤白於趙釋之佐後知謝弗見酬金絕弗受所著有事類偶鈔六十卷子廷樞平利縣訓導

張趾康熙壬子舉人焚鄰里借券多不索償 王瑱生員徵之孫僕女嫁富家子以小故自經富家懼禍暮夜懷金以賄瑱力却之

熊文蔚康熙戊午舉人性好施與嘗欲爲族之窮者代納欠糧適遇病其子鈺鈔出六百金以成其志 李與蘅太學生康熙

壬申歲饑出粟調濟全活二十餘家 姚巍生員於康熙壬申歲置籍錄族衆計口給粟不使流離邑令常公表其門

常有經廩貢生候補主事輕財樂善施藥餌捨棺木於縣西石塔莊大道旁築舍施湯以濟行人子季常例貢生孫鶴齡亦例

貢生俱修品篤行衆所信從邑有興創公事悉託總理

劉象奇康熙辛未歲饑於鄉窮者計口授食壬申各借給牛種鄰里賴以生活者甚衆 王彪於康熙壬申施粟施棺有鬻女者厚給值俟歲稔還其父 蒲周璧康熙六十年饑捐銀一百餘兩代完闔甲逋欠 李長蕤生員遇道旁哭泣者詢知爲欠糧二十兩將鬻妻賣子蕤卽於相識處貸與之終不告以姓名而去 王君中太學生道拾山西沂水人金四百兩還之 王相時康熙癸卯武舉遇寇圍雲陽鎮馬家堡佐邑令率鄉勇驅寇出境賴以生全者甚衆

梁樟廕由歲貢任寶雞縣教諭後陞榆林衛教授卒於官初樟廕家故饒性喜施與士貧寡姻喪不給者竭力資助病與藥餌刻所藏簡便方書散給千餘本以廣利濟教人務成其材不受

束脯甚得多士心子學淵庠生與弟學濬俱能讀父書

崔得祿弟得昌俱以行舉膺鄉飲祿於辛丑歲捐銀一千四百兩買米散給鄰近三里約五百餘家賴以全活者甚衆昌亦多所救濟於乾隆元年設里塾備束修膏火訓親鄰子弟貧不能學者子武舉毓麒亦慷慨好義繼伯與乃父風

張友仲庠生鄉飲介賓弟友貢友廉友偃俱太學生康熙六十年大饑闔村欲逃仲等捐銀五百五十餘兩買米周給計安四十六家大小口二百餘又仲善醫出診速以活貧者貢遊臯蘭焚債券二百餘兩廉在西寧買一女欲攜歸女泣告曰我礪伯大族女也爲人略賣廉卽訪還偃孝友撫姪如己出成貢生仲姪顯英監生有遠識左右家政舉賴之

周士彥捨棺施地掩洪福寺客死寄骸無數質於楚里人逃荒

南流者給食資鎡收恤之贖還郭原璞所鬻之子給周子正銀四十兩令自楚得還秦一李彥昌家不甚豐好施予

監生候選州同趙向榮爲族人天宇貧不能葬親資助之宇死撫其子子死又撫其孫養孤戚張明世於家爲之娶明世死又爲子娶子夫婦又死命子事明世妻如母以成其節 監生邢亨承父意湊捐二百兩出穀數十石擇地築堡聚廬四十家費不分派族化麟因荒鬻子亨爲贖歸又與房莊以安之

怡繩先貢生辛丑歲荒捐百兩以救里饑出五十餘兩修石村廢橋又捐三十兩完陳廷相議毀之婚 監生劉鏞辛未饑捐濟族里四十餘家辛丑饑亦行前惠 監生劉宗仁姪居坤生而失母仁令妻乳姪別雇乳食己子收卹母族蘇姓寡妻妻族張姓寡妻各使完其節捐葺閭村堡牆愛護鄰里 例貢生邢

璣事父孝又急公尚義舉

生員李珣孝友篤行常刊陰騭感應文勸人爲善壽九十廩生劉芳烈以品行充鄉飲大賓善教授邑科甲多出其門焚債券行多義舉

王永祐與兄旣析復合同居三代值荒執行救濟

謝理事母以孝聞辛丑饑有來質房產鬻子女者傷曰不忍阨人爲利不受券計口調之 門應麒事叔父母如所生待堂從如同胞五世同居屢值荒出粟調濟 門子擢例貢生遇歲歉捐粟賑鄉里有欠糧負債貧不能娶及客遊乏資者隨數給之趙攻太學生分任江南河工同邑牛姓客死慨與百兩給家口扶觀歸復自江淮策蹇歸家徒四壁淡如也人號淡庵先生翟從諭貿易袁州遇一人痛哭赴河諭急呼舟救之其人曰某

賣妻還買官米銀三十兩失去被拷不能償諭出已資如數予之又一婦人泣殿下橋問之曰有子十四歲因欠糧被拘去恐不保諭卽赴縣代還所逋他施惠多類此年八十餘乾隆元年

恩授八品頂帶

劉淵例貢生辛丑饑計族里食口散給之後遇時歉率爲常設學延師教里黨之貧不能學者 件聚儒於康熙辛丑饑出粟一百五十石救濟族黨 監生件元勳孝事繼母雍正十一年歲歉出粟百石給村中乏食者又每家贈銀二兩後一年復出粟百石置公所以備親鄰不足之需擇村老掌理還者收存急者借與不計利不責償衆甚賴之

監生鄉飲介賓賈雲蛟父病疽蛟爲餽膿敷藥瘡得瘳族有流亡他鄉者給資歸其骸安撫其孥施棺濟困行以爲常

涇陽縣志卷八

八

鄉飲介賓胡生蛟弟監生通海生員學海值康熙六十年饑捐銀百兩計本村大小九十餘口散給之賴以存活 生員李國俊亦於六十年捐二百金濟救里族雍正五年出數十金獨代闔甲差役

褚錫命舉人擴基子也安貧力學躬耕養親康熙六十年饑家僅有穀麥數石不忍獨飽分以與人 監生郭煥斗亦於六十年轉貸數百金散給鄉鄰後歲稔不責償

康邦侯友于兩弟造業豐腴同居不析爲闔族捐築莊堡共相保聚以子宏勳貴膺封典

王人佐廩生雲陽鎮人順治六年己丑山寇猖獗人佐倡修雲陽鎮西北門起樓五層集闔鎮婦女居其上俾不受賊污鎮人感之請毛昌宗爲之繪像以誌其德而王葵仲先生有贊焉像

今尚存

張琳監生雲陽鎮人乾隆十三年饑琳捐資二百餘金賑濟鎮人賴以存活贈以匾曰義高周恤子天一武庠生

王文思監生雲陽鎮人乾隆二十年鎮內公事有阻撓而不如衆意者文思出資八十餘金事遂舉行鄉里親睦衆人遺以匾曰尚義可風

王遜監生雲陽鎮人乾隆二十五年廣利渠河水衝崩議復開濬修築爲有地者阻遜因合渠數百家田畝枯槁率利戶白邑令議准水利大行隨又率衆改渠築堤至今人食其利

張漢英雲陽鎮人開過客店凡日暮途窮之士蒙周恤者難枚舉山西虞鄉縣薛君病歿在店始而湯藥繼而棺殮胥漢英經理其子鴻儒聞訃來奔凡行囊銀兩文券一一清付於是

義氣可風榜者有以惠周賓旅獎者有以義高元龍贈者

怡心瀆子子武舉成村里人石村普濟石橋爲瀆父於康熙年間出貲三百餘金創構越乾隆四十年瀆兄弟復出貲數百金重修之煥然改觀視昔尤爲完固

亢能敬監生乾隆十五年在京捐貲勸修涇陽會館囑管事者曰凡陝省紳宦寓此務好晉接而不許計租十八年在本村捐貲建修嫻睦倉貯穀千石遇歲歉按人出放不計息又設立義學獨力延師凡貧不能讀者咸就焉又在西安府會捐修涇陽館招寓應試諸生累行義舉如此

武昕貢生逢歉歲每給牲畜籽粒以助畊者出貲粟以周貧不能婚死不能葬者卽有房屋坍塌不能修葺亦必酌助經理義行屢著

李廷桂原任通渭縣訓導乾隆十三年及二十六七等年歲歉散糧周濟每年播種時按畝散給籽粒二十七八年閏甲拖欠國課埽數代完里人無力婚葬必酌其多寡助理成全又二十三年在雒城渡捐貲創修橋梁迄今橋猶堅固人不病涉

賈獻策貢生幼年失怙出入必稟命於兄稍長敬重斯文乾隆十一年捐瀛州書院膏火銀四百餘兩親友借約或璧或焚不下數千金乾隆十三年歲饑出銀五百兩賑濟鄉黨 臬憲武公以好義足風表之其妻孟氏奉策臨終所囑於乾隆三十六年饑又出銀三百兩散給鄉黨親族以遂其好施之志亦賢矣哉

賈治策監生父早逝四時祭享痛哭移時母老備極色養及歿哀毀骨立泣血三年甚至喪明後雖能復覩然竟殘目以終居鄉時待人溫和爲學者勵以精勤服賈者教以節儉他若憐孤寡卹宗族施棺木濟困窮種種義行難以枚舉雍正癸丑冬公薦鄉飲大賓有司匾其門歿後以子綬貴膺封五品人咸以爲義行之報

孟師孔監生鄉飲大賓乾隆十三年大飢孔卹不舉火者四百餘口孔按人月給米三斗次月又每給銀一兩居人賴以存活十七年歲歉計口授粟更給銀錢二十五年亦然二十四年又將里民逋賦計正供及耗羨如數代輸前任李令高其義而旌之復設義塾兼贈紙筆膏火涇屬婦女多腰腿疾購良方備藥餌以施之數百里外皆賴以愈每年藥資百餘金至今子孫猶奉行焉

宗子繩廩貢補授國子監助教天性純篤祖母臥病衣不解帶

祝神明願以身代及歿哀毀骨立三年不見齒不入內室壬申買一韓姓幼子爲僮後知宦裔焚券令歸家雖不豐而遇年饑必散糧濟急隣里貧不能葬聘不能娶者亦必勉力捐助而且素性好學勸人子弟讀書文脉賴以不墜

件聯第孝義性成仁厚夙著乾隆二十一二年饑饉相仍散麥二次件氏合族百有餘家均沾其德二十五年見族中饑寒交迫難以卒歲而又乏資周卹晝夜不安爲貸銀百兩以濟之屢行義舉親族里黨均匾其門

維從洛生員事親最孝備盡色養其父病瘳七年朝夕侍側及歿泣血三年不入內室後事繼母問安視膳不啻生母母臥病床褥衣不解帶者年餘卹中子弟貧不能讀者設家塾以訓他若歲荒賑濟及婚葬不能者悉出貲以勸其事種種孝義難更

僕數宜鄉里之推恩戴德也

李忠信早年失恃母病在牀不離左右及歿廬墓半載親友因其抱病勸歸守制三年不入內室其兄卒於京邸聞訃悲號欲絕扶柩歸葬乾隆十一年公舉鄉飲邑令旌之歲歉誼篤桑梓散糧周濟他若捐修廟宇設立義塚義學資助婚葬扶危濟困種種美行難以盡舉

劉如預貢生鄉飲大賓康熙六十年歲饑本村百有餘家俱按口月給米麥乾隆十三十七兩年亦然府憲旌之村人亦多稱頌

賀珍監生繼母劉氏染病親嘗湯藥因危篤并爲嘗糞及歿居喪三年足不出戶珍精於醫道心存濟世不計藥資遇貧者并資助藥餌開設書館并備紙筆膏火無力讀書者悉就焉迄今

里人猶爲稱道

監生聶宗孔少失怙恃事繼母曹氏以孝繼母身患瘡痍親爲調劑日夕侍側未嘗少懈其祖父遺券約有千金擇其無力償還者盡行燒燬凡遇親友婚喪無不量其力而酌爲幫助屢行義舉鄉里稱之

木鐸段成錫字玉章髫髻喪親常存孺慕事嗣父母孝養兼盡歿後哀毀骨立嗣親遺一女早寡家貧子幼相邀同居共食廿九年姊歿竭力殯葬甥長代爲完婚妻王氏相成錫以奉翁姑曲盡婦職亦以孝稱曾孫焯乾隆己亥舉人咸云孝行之報

生員韓起麟天性孝友有兄早經另爨及歿卽請寡嫂同居撫養三姪皆爲娶妻成家無異所生有故友魯姓遺子無倚抱家教養爲之娶室又窻友杜姓歿後遺有七十老母孤苦無依麟亦相迎膳卹生養死葬儼同親姪凡愛老恤貧種種義舉皆人所難

監生張四維事親以孝人無間言弟兄式好里黨交親補修道路設立義塚資助婚喪扶危濟困屢行義舉

管文運髫年喪父孺慕不衰慈母在堂承顏盡孝友愛昆季門無間言周卹婚喪玉成其事一時被惠者不一而足

監生蒙永泰天性篤厚事親以孝兄弟友恭父病親嘗湯藥衣不解帶者經年好善樂施婚喪致助常敬惜字紙以素卷收換婦女所用針線書本乾隆二十七年歲饑村中貧不舉火者頗衆散糧接濟賴以存活按給籽種人無閒田又於合族捐修祠堂並置祭田闔村咸知感慕

鄉飲耆賓張從禮少失怙恃四時祭祀悲慕猶存善事繼母色

養承歡及歿哀毀骨立廬墓三年未嘗飲酒茹暈居鄉以禮待物溫和爲學者勵以精勤服賈者勉以節儉捐資成婚施棺助喪憐孤寡濟困窮設立義學製藥療疾義行頗多

誥贈大夫邢守禮父亨義行載前誌中未冠已失怙事母侯氏以孝持弟幼弱伯兄謀分析禮收在蜀遺貲積與時俱家得復賦性沉毅居恒以禮自範危坐終日無欬容每教子必舉諸葛武侯戒子書以勵之衣取淡素器取渾堅遇人有急則不吝囊橐及卒持生芻者有諸子所不識尤雅重士人有以士林沾餘庇之句相唁者實錄也

節烈

節烈史列女傳例也非奇行表著可泣鬼神及勢位富厚之家力能上達者傳之蓋寡士皓首力行而死同草木女毀顏守節而沒於糞壤深足痛也宣姜雖貴有愧栢舟文姬雖才不及曹娥王化起於閨門女教期於貞一人心風俗正始於此不妨多錄以示觀感故爲廣採之以續其後

唐

李氏楊三安妻事舅姑以孝聞及舅姑與三安相繼歿也遺二子幼而家復貧寡李乃力田夜則織紡數年葬舅姑夫并夫之叔姪兄弟凡七喪唐太宗聞而異之賜帛二百段遣州縣存恤之所居後生芝草數十莖至明永樂朝采入孝順事實

金

王氏進士武師古妻師古疾且死與訣曰愚不幸命短汝年少當早圖他適後王氏誓人曰生爲武氏婦死卽武氏鬼也竟守節奉舅姑如初詔旌表其門

元

焦氏袁天佑妻至元間天佑從軍死甘州焦年少宗族欲改嫁之哭曰袁氏不幸三世早寡皆守節義豈可至我遂廢我生爲袁氏婦死則葬袁氏土耳衆不復敢言事聞旌表

二楊氏李家姑婦也姑之夫逸其名婦夫李廷蕙姑婦俱早寡相繼守節事聞旌表縣令名其所居街曰重節街

李氏符文進妻夫死時年二十六織紡撫育三子誓不再嫁至元中詔旌其門

劉氏吳君錫妻未配而夫亡夫貽語許更事以圖衣食氏誓死守節甘貧織紡凡親鄰吉凶往還之禮杜門不出三歷饑饉草蔬木皮以度殘年終不失其所焉

周氏適張李氏適吳王氏適朱賈氏適蔡俱旌表王氏適馮則未旌表惜舊志未詳其夫名並行事

明

張氏李秉妻年二十一而秉死子茂甫一歲守節不嫁育遺孤成立而舅姑亦得終養正統間旌表

李氏張福妻福死時李年二十三守節四十年以織紡嫁夫三妹撫孤子敬成立成化間旌表

甯氏劉釗妻釗早亡撫遺孤瑾以年勞授官成化間旌表宗氏何瑚妻相夫業農能識大體瑚死有遺腹子將產氏曰吾

今從夫於地下則吾死子亦死吾不死子生良人亦未死也及期而子生命其名曰憂生撫子成立壽七十一而終嘉靖間旌表

張氏劉和妻夫亡守節事姑以孝聞嘉靖間旌表

郝氏王朝妻夫亡苦節以撫幼子歲儉家人私語曰糊口不給何守節爲氏痛泣以頭觸柱曰吾忍死稱未亡人爲王氏一塊肉耳令吾志不白者吾頭且與柱碎矣衆急救止左面青痕終身不變嘉靖開旌表

白氏舉人張朗妻年二十二夫亡遺子雲凌方七月氏孝孀姑撫子成立嘉靖間有司表其門

閻氏周仁學妻年二十而夫亡親饋食於穿穴者語之曰穿必大其擴穿穴者應且笑謂少婦將欲從夫地下乎葬之先一日自經死遂同穴焉

劉氏張恩妻恩死劉痛哭不食積七日亦死事聞旌表

張四桂張會女也倉早故四桂與母李氏居年十八爲對隣王宰所悅時以言挑之四桂心畏惡密以語母已而母之田間從外扃其戶宰知踰墻入強之四桂據其炕惘惘毀身終不移宰用錘斷其頭而去萬歷間崇祀烈女祠

馬駮妻趙氏趙圯妻韓氏張允妻王氏生員駱希顏妻王氏李雍妻趙氏任進孝妻王氏王洋妻趙氏師魁妻李氏俱獲旌表熊尚義妻張氏王瑚妻管氏陳官妻馮氏生員張崇妻秦氏李世開妻劉氏生員韓汝復妻王氏俱有司表其門徐威妻張氏兒婦淡氏孫婦鄭氏三世守節尤風化之美者惜未旌表以上舊志俱不詳其行事

王氏生員魏龍光妻年十九而夫亡痛不欲生縊死柩傍萬歷間有司以事上聞建坊入祠

王氏生員張紹祖妻年二十一夫病篤執其手欲有言氏知其意輒自誓不再適夫瞑恐舅姑奪其志痛哭不食七日而死萬

歷間兩院旌獎入祠祀之

楊氏王元登妻年十九夫亡遺子可久歲餘有司至戚勸以改嫁氏正色曰上有翁姑下有幼子仰事俯育吾責也爾何出此言其人赧然而退里中許御史守恩欽其貧而有德以女爲之媳焉氏壽八十二終於萬歷二十七年

魏氏生員杜易芳妻萬歷三十二年芳亡氏年二十七事孀姑教子生員恒新益新成立年五十七終

袁氏趙翼明妻萬歷三十四年夫亡氏年二十七苦節四十六年撫遺子之汴登順治戊子舉人司理王公表其門

晉氏進士劉宇曜妻適劉五載而夫故年二十絕食求死姑勸止之撫前氏子繼烈教養辛勤繼烈入庠以廕爲長蘆運副皆母力也孫堯康熙己酉舉人

張氏儒士郭維藩妻萬歷間年十九而夫亡遺子京方一歲撫孤入庠壽逾八十而終知縣李公旌表孫茂泰順治己亥進士白氏張大紳妻萬歷間夫故氏年二十有五遺孤嘉猷方五歲豕貧以紡績撫其子子復故又撫孫永思四十餘年以壽終

張氏生員劉源潔妻年二十而夫亡撫幼子丕基躬操蠶織娶媳魏氏丕基又早逝魏氏年十九生子文瑋二歲魏氏屢欲死姑張氏諭慰之服闋有親戚勸其改嫁魏氏痛哭廢食者數日自以有疾當醫密置砒藥器中將飲張氏覺卽舉器碎之因泣曰癡兒何至如是汝旣有志其偕吾守節可矣姑婦共守四十餘年張壽六十餘魏壽七十餘道府旌其門曾孫儀恕順治乙酉舉人

竹氏王可久妻可久年十九嬰疾二十九亡氏敬侍湯藥十年

如一日夫故悲哀不少間迨歲終感念存歿遂絕飲食伯可大以子紀和年幼諭氏撫之氏泣曰有伯在我死何憾頃之嘔血升餘而死孫華玉康熙丙午舉人

韓氏生員劉思向妻崇貞己巳向亡氏年二十四僅一女尙在襁抱苦節三十餘年而終

王氏劉從龍妻龍於崇貞壬申入蜀亡氏年二十有九以紡績葬翁姑並翁之父母家貧無力執衽歛土以封墓門撫二子微衍成立苦節二十六年而終

岳氏生員魏肩蕃妻夫亡無子年正少兄嫂逼令改適氏剪髮明志者三甘貧躬織以終餘年卒於明季順治間入祠祀之

魏氏生員樊飛妻年二十一夫被流賊所獲氏長跪乞夫生賊不許殺其夫氏輒投井救出誓不受污而死時崇貞丙子歲也

涇陽縣志卷八

七

事聞旌表康熙間入祠

與前張倉女張氏魏龍光妻王氏張紹祖妻王氏魏允蕃妻岳氏同登縣街節

烈坊知縣路振飛聯云綠林狂焰痛蘭摧清露嶺頭血字漬千秋重赤紅粉弱姿悲玉碎差峩山下芳軀埋九地猶香

韓氏李惟蔚妻夫亡氏年十六苦節五十餘年而終知縣趙公旌之

羅氏陳國璋妻夫死男女無所出而家中落時翁且高年弟姪皆幼氏葬夫訖又葬翁家益落而節不改以終一時名人有詩表其節

高氏劉居仁妻氏字居仁未婚而居仁入蜀迎父久不歸母娶氏於家以待其子後蜀兵變父子俱死訃聞母令改嫁氏守節誓不他適年七十而終

馮氏趙廷宋妻夫亡痛悼廢食者數日旣而思曰夫雖死尙有遺腹幸而成男趙氏之不絕將在此乎因勉食而生子紹芳教

之成立既而紹芳死又撫其孫師汴二十三而寡七十五而歿
教諭譚公表其門

楊氏王彥學妻彥學病戒氏曰若性烈必爲我死老母二弱子
將誰依乎未幾學故氏哭欲死姑以夫語諭之氏紡績佐蔬水
督二子學能不負夫遺囑云

雷氏監生郭鳳翔妻鳳翔年二十病酒卒氏方十九流寇至其
村標幟於門曰勿犯節婦之家後賊又至居人率入節婦家避
之苦節六十年而終督學李公表其門

周氏穆大照妻年二十五而夫亡止遺二女伯氏憐其無依令
更適氏誓死不從號泣終日不食伯氏義之年六十餘而終

袁氏張體仁妻年十四歸仁甫三月仁貿易滇黔氏獨處十年
仁旅死守節六十年卒鄉先達立碑以旌之

馮氏生員趙有節妻夫工右軍書氏每佐筆墨知大義節亡氏
方少艾哀痛枯一目苦節四十年教子炳然入庠

姚氏舉人何漢傑妻夫亡號泣欲死以兩子幼孱勉爲視息苦
節甘貧日事績紡子稍長卽口授孝經以教之次子鵬翥康熙
己酉舉人

王氏生員張用光妻夫亡氏年二十二並無子女苦節以終
吳氏王尙禮妻夫亡氏年二十五堅志守節撫幼子建極入庠
年七十三而卒

李氏陳國憲妻年二十六而夫亡事姑撫子苦節四十餘年

羅氏郭來輔妻崇貞己巳賊至懼辱匿崖洞間賊縱火焚之同

匿者爭趨出氏獨赴火死

有詩見
藝文

姚氏曹登祿妻崇貞己巳義不從賊投崖而死

有詩見
藝文

馬氏王福盛妻崇貞己巳為賊所掠堅不失節投井死有詩見藝文

楊氏甯一鵬妻崇貞己巳賊掠不從投井而死有詩見藝文

潘氏王進祿妻崇貞己巳賊至被擄見其色欲污之氏拔刀毀面自墮崖下死有詩見藝文

楊氏王三有妻崇貞乙亥九月流寇掠氏大罵不從賊怒斷兩臂及股割其腹有犬守其殘骸逾二日瘞訖始去

韓氏師燮元妻寇掠不從大罵死之

王氏生員康嗣昌妻崇貞乙亥秋被賊掠罵不絕口賊怒殺之本縣旌其門

賈氏柴良卿妻崇貞乙亥秋流寇至良卿投井氏適避他所賊去氏尋夫知不可救遂同死井中

白氏牛象煜妻崇貞乙亥秋寇至被執詈不絕口賊怒焚之

于氏楊方妻訓導于徵之女年十九歸寧而賊奄至強之行氏攀樹大罵賊怒殺之割其耳以去

趙氏梁爾翰妻聞賊近自縊督學旌其門

陳氏王三統妻流寇至氏投井中賊去鄰人引出賊又至復投井死

何氏監生王運昌妻年二十流寇令氏入厨為具氏知不免以厨中刀自刎

張氏韓爾訥妻賊攻堡陷氏避居高樓賊焚樓氏有子方襁褓跪乳母曰吾家僅有此子為韓氏一線之脉好為撫之語畢墜樓而死

任氏任盡禮女年及笄寇至掠之以行女陽為從行見一井投之賊怒下石遂死井中

李氏焦希商妻賊臨堡城自縊死有扁旌其門

何氏父承怡年及笄未字流寇至隨母避窑中賊焚窑搜獲母子俱不從賊怒並殺之

李氏張佐妻流寇喜其少而有姿與一扇氏佯受之給至井傍賊覺坐井上忽有傳賊語者賊起應氏卽投井死

楊氏李魁吾妻流賊突至迫其行氏不從賊牽髮以行比見賊魁初以甘言令縫紉又不從賊怒刃之

茹氏生員韓鼐妻年十六流寇見而悅之令乘馬氏張目大罵賊猶豫未忍殺傍一賊持刀斷其首

齊氏牛應麟妾寇至携子象煌避樓中賊攻樓不下焚之氏推子墜樓得生氏自焚死

屈氏周仕璉妻崇貞甲申賊掠馬上罵不輟口賊怒殺之

王氏王養心女年及笄見寇劫掠投井死

呂氏王之臣妻賊強挾馬上由馬躍下者三賊怒其不從殺之陳氏王三秀妻爲賊所獲大罵而死

井中烈婦明末賊掠永昌堡有二婦墜樓不死復投井死一場氏三原秦某妻事載三原志一失姓氏今第呼爲井中烈婦云李氏劉澤溥妻結褵甫十日歸寧路遇流寇掠上馬氏奮力躍下罵不絕聲賊怒殺之

李氏趙邦堅妻堅應童子試失期懼父母督責自縊死氏剪髮入棺以殉哭泣絕食越十四日死

袁氏監生劉顯祖妻年十九夫亡矢志守節值流寇肆掠氏懼辱泣以幼子付老僕自投井賊聞義而舍之傷左足終身殘廢子繼業妻曹氏經業妻鄧氏後俱以節著

樊氏王招賢妻招賢客死紫陽氏年二十一矢志撫孤後搬夫
柩歸里守節六十八年卒

郭氏廩生張元吉妻年二十一夫亡父母勸令改嫁氏截髮自
誓撫子茂英成立守節五十餘年

劉氏明處士傅登選妻年二十三夫故遺子納牖甫三歲氏矢
志苦守食貧力作撤簪珥勤織任舅姑先逝致祭必誠深居不
履戶外教子率自驗課程凡治內外一凜大家風範以故納牖
得成端士後孫曾輩科甲蟬聯以清白吏著稱世食節烈之報
守節六十五年卒年八十有八

本朝

李氏張士傑妻年十九而寡無子請伯兄子爲嗣以守未幾殤
更求於仲仲難之曰子非所吝能俟十年否氏許之後十年復

涇陽縣志卷八

三

以爲言仲嘉其志以孫衷膚與之及老出枕下刀示孫曰藏此
已三十餘年矣康熙乙酉旌表年七十八歲嗣孫丁酉舉人
王氏戶部郎中韓望妾望卒氏號泣七日經死婢紫燕亦哀痛
絕食死氏素畜一猫亦觸棺死

王氏姚文字妻字客死蜀中氏年十九無子女鍼帶餬口獨居
一樓不下者六十年蒿藜滿階如無人之境卒年八十人呼爲
樓上阿婆

劉氏李一鷗妻年二十五夫亡家貧甚氏勤紡績仰事俯育常
夜黑操作傷指血濺其子嗣白頭比歿嗣白哀痛幾死廬墓三
年母節子孝人共稱之

李氏廩生羅祚妻年十九而寡子方週歲氏矢志撫育苦節四
十年

岳氏生員高鼎新妻年十八夫死事孀姑撫三歲孤子以節終
邑令劉公表其門乾隆五年奉

旨給銀建坊旌表入節烈祠

朱氏生員溫如玉妻年二十夫亡撫子大訓入邑庠卒年七十
韓氏生員熊彥妻年二十四夫亡甘窮撫子維男雍正丙午舉
人守節三十年 文氏生員陳輔璋妻年二十六夫死無子二
姪幼孤撫之底於成立姑病痿氏代爲梳櫛匙箸終其身不懈
趙氏再縋妻夫死翁姑亦早逝生子纔八月矢志撫之得成立
卒年八十 紀氏牛士仁妻年十九夫死揚州生子纔數
月翁年已六十氏備極艱苦仰事俯育翁年九十每向人稱其
孝節 張氏程岫妻年十七岫亡生子甫數月守志撫育今年
已五十 傅氏劉惟溫妻夫死子瀨方彌月氏誓死撫之子入

涇陽縣志卷八

三

國學 郝氏謝維宣妻年十八而寡生子甫彌月氏苦志撫養
至於成立卒年八十 王氏何洪妻洪客死他鄉遺腹生子氏
矢志撫育貧困不踰年七十餘卒

鞏氏侯萬程妻年十七于歸僅期年萬程偕弟貿易湖南氏與
弟婦同居後萬程兄弟俱客死弟婦亦亡氏無子撫七歲姪苦
節五十年 李氏牛光璿妻夫亡氏年十五哀痛不食者數日
矢志事姑撫姪爲嗣歷五十年如初督學表其門 郭氏監生
高六傑妻傑亡撫姪芳蕙爲嗣辛丑歲饑諭子出粟賑濟里黨
德之 陳氏李丕顯妻年二十夫亡貧不改嫁撫姪朝棟爲嗣
趙氏張璠妻年二十五夫死無子孝奉孀姑撫姪文炳爲嗣守
節三十年 郭氏劉惟儉妻夫死無子勤儉自守撫姪如預爲
嗣今例貢 李氏張麟洲妻夫死無子或勸改嫁誓死不從撫

堂姪振業爲嗣守志三十年卒 魏氏苗穉妻年二十二夫亡無子撫姪必美爲嗣苦志三十餘年卒

周氏監生龐忱妻因子嗣艱勸夫置妾孟氏連舉兩男忱死氏年二十七與孟共矢栢舟子繼祖例貢生 一土氏程雲路妻夫死撫孤與妾同居妾求去氏泣謂夫亡子幼我二人相依爲命若去我安倚耶妾感之後十年而改適子已成立得竟其志

劉氏牛光輔妻輔客死河南氏扶柩攜子徒步歸里現年八十鄭氏王朝縉妻夫亡父母勸令改嫁氏投井老僕救之得免苦節四十年 張氏龐悟妻年二十三夫亡食貧撫孤誓不改嫁馬氏鞏天祐妻家貧守志康熙三十年饑氏竭力女紅易粟以奉孀姑日與子但嚼菜根 袁氏封書田妻夫死撫孤家貧甚晝則將茶夜則紡績歷三十年紡具凡三易焉 丁氏康運晟

妻年二十三夫亡苦節教子年七十餘猶康強不衰子兆吉功加副將

李氏趙旭妻年十九歸旭明年旭遠遊後竟披剃寄書囑婦改嫁氏守志不從曰夫旣甘心入空門妾亦甘心作寡婦歷四十餘年卒 李氏苗應元妻尚未婚應元已病篤氏來歸侍湯藥衣不解帶目不交睫者數十日及死氏誓死以殉七日粒米不入咽翁姑百計勸諭始一進食家人恐其引決環向守之以哀痛致疾越二年卒 王氏杜仲妻年十九仲死親族以家貧無子咸勸改嫁氏誓死不從鄉里共旌其門

劉氏貢生張天維妻早寡守志教子成童 韓氏張明世妻年二十四夫死遺子殿吉氏撫育婚娶未幾殿吉死氏以守志無成痛不欲生會殿吉遺腹生子氏撫之而孫又殤氏年已逾六

十衣食不給寄食親姪以終

韓二姐邑民韓禮女與白忠和次子洪娃童養爲婦性慧而貞年十七尚未合卺雍正九年八月二十五日忠和父子五更出往田二姐扃戶入厨炊飯適嫂馬氏新產臥樓上睡覺屢呼二姐不應強起下樓視之二姐髮亂履脫已殺死地上和有族姪白恒同室居喚之無應聲急喊鄰人啟其戶恒已自縊死兇刀在恒炕洞內始知二姐拒恒之行強而被殺也因兇身死無人証據未蒙 題旌邑令表其門

李長枝妻董氏生員朱佐湯妻張氏師廷桂妻潘氏朱昌齡妻商氏張奇柱妻鞏氏維滋蔭妻王氏劉之屏妻秦氏王之俊妻劉氏張攀奇妻席氏李佐周妻韓氏周士傑妻田氏李文采妻鞏氏張俊妻岳氏生員劉家傑妻海氏張天盛妻樊氏劉中道妻韓氏孟可法妻盧氏生員蔣廷柱妻巢氏趙邦國妻茹氏趙有簡妻郭氏王象箕妻常氏淡承烈妻劉氏鄧毓采妻趙氏張于蕃妻仝氏馬從馭妾翁氏李佑庚妻張氏洪高妻辛氏王士望妻王氏生員張肇昌妻張氏南宮俊妻路氏

舊志云以上俱甘貧守志始終不渝但年例未詳事實不著不無遺憾焉

盧氏王國英妻年二十五夫故矢志撫孤楷又撫堂孤姪士奇俱能有成初氏紉績自活旣以勞作漸裕臨歿囑以和睦迄今七世同居守節四十九年卒年七十四

楊氏馬躋繼妻年二十二夫亡遺一子一女諷以改適者誓死以拒撫前出子女與已出無異翁姑老俱病瘳氏手親服食爲滌溺器始終不渝後長子歿無後氏哭之慟及臨卒囑已子應

元以所生爲兄嗣守節二十六年卒年四十七鄉里以節孝流芳表其門

楊氏呂得新妻夫歿撫子屢值歲荒饑寒不悔子宣陽等三人成家和睦不忝所訓守節三十三年卒年六十三
商氏朱長齡妻年二十夫歿家貧苦守上事舅姑下撫幼子正仁守節六十餘年壽九十三

心蒙養老肉帛

韓氏順治戊子科舉人強體道妻年二十二夫歿湖南氏守志撫子故宦族女素通書史教子應祥自授章句後入泮有聲以遊學久於外氏又撫孫而毅亦列庠序早歿妻朱氏年二十八遺子二長三歲次一歲孤窮無親屬可倚氏紡紝自給遇荒忍餓不干姻婭撫子有成俱完室抱孫焉韓守節四十三年卒年

六十四朱守節三十五年現年六十三祖姑孫婦蓋世其節云王氏吳初繼妻年二十五初故氏撫遺子提甫二歲視前出子如一體俱至成立初氏不得意於姑罵詈順受後卒愛之初歿時弟客於外及歸氏一一付所藏堂娣病危遺一孤曰姆在吾無憂也後姑及叔與娣相繼歿一身拮据十指屈無伸者守節五十一年卒年七十六

李氏王者起妻年二十四夫亡甘窮守志晝灌園夜挽磨餘日紡績養老姑畢殮葬撫己子與前出一子一女俱有成苦守五十餘年初前子不馴卒化爲孝女後亦以節著

閻氏王金妻年二十二夫故子國政甫二歲姑席氏已七旬氏織紝爲活屢遇凶荒饑寒自忍上終所事撫子有成守節四十五年卒年六十六

唐氏候選州同韓憲妾也嫡朱氏先亡生子繼愈付氏撫育及
憲歿氏年才二十二族人竊有議氏哭夫柩前誓以頸血澆之
議乃息弟自江都來館於別院贖送付兒愈送之示不私督奴
婢操作漸積金粟值辛未荒散賑宗戚愈入成均卽以家政授
之前後邑令皆區其門守節四十年卒年六十二

張氏儒生趙漢英妻年十九歸趙勤作以助夫學二十而寡無
子括粧資治夫喪拮据衣食事老姑撫堂姪鳴岐爲嗣鳴岐夫
婦早亡又撫二幼孤苦節四十二年卒年六十有三

強氏刁復教繼妻年十九夫亡遺子還醇才兩歲刁族及母家
屢勸改適氏曰吾有子可撫紡績足以自活斷不累人值明末
兵荒歷盡艱苦遺棄年十八入泮氏卒年九十三守節七十四
年

張氏來慎妻年二十八居孀無子撫嗣又天撫劉姓彌月子自
有爲孫自有生子五分祀劉來兩門氏年八十五歲苦志五十
七年

金氏江南徽州休寧人考職州同王澤萬業離於徽娶之生二
子澤故氏年二十二父母計畱止之泣曰此呱呱者王氏子也
翁姑在北義難畱此遂竭蹶歸秦家計中落甘茹荼毒事親撫
孤歷三十六年卒年五十八

虞氏江南蘇州吳縣人縣民劉芳烈客於蘇納爲側室生子女
各二年二十八芳烈病故姑在陝憐氏無倚寄書諭令更適堅
志不從業女紅以撫子女守夫柩芳烈弟型至蘇先遣長子秉
國歸以慰姑望後攜次子定國還秦孝事老姑嫡胡氏患癱氏
服侍十三載不少怠長子事商次業儒俱成立氏少知書後家

貧自爲其子發蒙守節三十一年卒年五十九於乾隆三年闔
學公具詳請具 題侯

旨旌表

梁氏生員孟培性妻年十九夫亡遺孤瑋在襁褓矢志撫育授
室生四孫卒年七十餘守節五十餘年

劉氏生員張鳳翽繼妻年二十七夫故遺子士英方七歲氏苦
志撫育娶婦劉氏其族姪女也士英又客死湟中劉年二十五
子維良宗良俱幼勤女工事孀姑送其終撫二子俱授室哀懇
堂兄張士錦遠致夫柩歸維良又早喪妻王氏年才二十二父
母諭以更適乃慟曰上有寡姑下有弱子去則老少何依誓死
而已哀傷致疾年餘卒劉氏守節三十四年卒年六十一婦劉
氏守節三十四年現年五十七孫婦王氏守未久死終其志三

涇陽縣志卷八

三

世少寡誠不幸以三節著則賢矣

梁氏張鉉妻幼讀書知禮年二十夫死都門聞訃投井以救免
長齋誦佛經二子長監生士漢遵例贈鉉儒林郎氏安人次士
浩歷官瀘州知州又王氏鉉姪生員張士濤妻年二十四夫因
責債冀州已有病與氏訣曰汝止一女今有娘能爲後計乎氏
剪髮爲誓夫去數月生一子夫歿於外櫬歸痛絕一晝夜乃甦
卽引刀抉面矢撫子女守節五十二年

張氏生員魏韓妻年二十九韓歿遺子大梁九歲矢志撫育入
庠有聲娶婦黃氏大梁病謂黃曰孀母無依魏祀其絕矣黃誓
以奉姑終身爲己任梁死黃年初十八也取房姪子億爲嗣方
二歲撫至授室生子事姑病侍藥喪盡禮張守節六十三年卒
年九十二黃守節五十九年卒年七十一

吳氏辛佩琚妻年十六夫故無子欲身殉念翁姑無依忍哀力作生事死葬年已四十日吾事畢可死矣族議以姪仲南爲嗣以養以教入太學守節五十八年卒年七十四

楊氏邊克順妻年二十夫歿家窮苦舅姑俱老氏力作供養撫三歲子世傑有成屢遇荒歉得米奉親自食糠粃守節四十八年卒年六十八

牛氏張克勤妻年十七居孀事老姑撫幼子值明季旱荒啖糠茹菜寇至刺面持刀以死拒賊憐其節而退比舍俱焚氏家今獨存守節五十八年卒年七十五

段氏候補都司張友顏妻年二十六顏病故誓以身殉因有遺腹不忍絕強活以奉姑生子顯猷撫之成例貢生初家計漸迫值歲荒率老僕婢操碾臼上供精鑿自饜糠麩以苦成節守志

三十三年卒年五十九

李氏劉應昌妻年二十三夫故食貧撫子初夫患癱數年氏扶掖不懈奉翁姑生事死葬俱盡禮守節三十九年卒年六十一
王氏李篤生妻年二十五夫歿無子衆議嫁誓不從孝事翁姑撫嗣子作揖守節四十五年卒年六十九 楊氏李琅妻年三十撫五歲子安貧不渝其志守節三十餘年

雒氏劉倫妻年二十二夫亡無子翁在堂姑繼也虐之嚙肩臂傷鱗鱗逼之改嫁誓死不易夫有幼弟非姑出付氏撫之後弟長事氏以姊侯弟生次子撫爲夫後父母歿義不歸寧止一樓終其身前令王扁以婦節母儀給米炭養之十餘年守節六十五年卒年八十七

馮氏楊士星妻星初入川覓生計氏方娠數月夫客死氏年時

二十生子三魁家赤立無舅姑兄弟僅有生父又衰老徒依婦氏賃房住賴甥趙龍門代給薪水紡績爲活撫三魁娶楊氏三魁入蜀搬父骸楊爲代養魁亦客死楊年二十二姑念其年少無子勸令他適氏泣曰媳所以不死者以姑老無人養耳姑百年後媳歸母家度日姑無慮又徙谷口賃居母家勸嫁亦不從康熙六十年荒姑憐氏餓食不忍飽氏涕泣勸姑食自忍饑不言事姑終養自完其節馮守節六十三年卒年八十三楊守節四十年卒年六十三

牛氏劉文運妻年二十三夫亡事姑撫子守節三十二年卒年五十 傅氏韓敦禮妻年十九夫客死粵東自力女紅事衰翁子國棟僅八月撫之成立亦能孝守節五十年卒年六十 索氏楊可文妻年二十四夫亡其母勸之嫁引簪自刺損一目

撫姪克振爲嗣守節四十五年卒年六十九

張氏儒生吳承伯妻年十八承伯病篤視氏涕泣不語氏曰我知之矣願矢志以奉二親承伯大痛而歿氏剪髮代殉勤女紅賣粧奩竭力旨甘康熙六十年饑或諷之改嫁復斷再生之髮以拒初承伯亡有胞弟僅歲餘氏佐翁姑撫養授室及生子自撫爲嗣終其身窮苦不悔守節三十六年

張氏儒生趙廷勳妻年十九勳歿無子父母勸嫁卽絕歸寧撫弱女過繼胞姪爲嗣守節五十三年

張氏徐鼎鏞妻年二十六鏞死氏奉養翁姑撫育胞姪捐數百金產爲族人代完逋糧守節四十六年卒年七十三

高氏生員武可舉繼妻年十九夫故已無出撫前出子爲之娶妻生子而前出子又歿再撫遺孫家無次子孤苦備嘗守節六

十餘年卒年八十一

張氏杜顯相妻年十九夫亡遺子通方一歲或勸之嫁呼天仰誓以事親撫子爲己任子後入庠守節十三年以三十二歲而卒年雖不永死完其志矣

周氏楊登霄妻年二十一夫旅亡遺子九位僅四歲矢志撫育後得歸夫柩卒年八十有二

張氏儒生劉大賢妻年二十四夫亡姑老多病侍奉不解衣寢者凡四十日教養二子品超品逸俱列庠序曾孫繩繩守節五十五年卒年七十有八

王氏儒生劉佇鵬妻年二十五夫故家無伯叔可依又無莊田可給氏勤鍼黹事老姑撫所生六月孩帖瞻遇荒忍饑自甘賴族叔洋縣訓導劉以董周給以長其子初氏來歸始年七十夫

自退貧不能養氏賣奩佐之孝行尤足多焉守節四十五年卒年七十

王氏生員王楫妻夫歿以父病繼母老相泣託氏垂涕許之後有賄媒誘娶者氏拔刀逐之遂以刀爲枕自織紵子析薪易米養舅姑子文芝亦成家每祭則陳氏所枕遺刀守節二十七年卒年五十三

盧氏王之舟妻年十七夫故遺子三奇方九月兄嫂逼嫁不從食貧撫孤至於孫曾繞膝守節四十七年卒年六十四

姚氏張完素妻年二十六夫亡家貧屢值歲歉甘凍餒勤織紵撫前出子底於成立守節六十二年卒年八十八

張氏舉人郭文炳妻年二十五夫故無子氏念父貢生張恒翁進士如儼祖翁舉人鼎藩恪守詩禮遺訓撫堂姪爲嗣變產連

舉三世喪身居士密無怨苦節四十八年而卒

李氏趙天仁妻年二十六夫亡甘貧誓守遇饑歲則啖糠嚼菜卒撫二子成家守節六十八年卒年九十四

仇氏陳振祉妻年二十八夫歿無子撫姪陳煥爲嗣悉心教養守節二十二年而卒後煥任衡山知縣氏誥贈孀人

李氏劉大器妻年二十八夫故遺二子一四歲一兩歲家酷貧值荒歉日不再炊姑諭曰盍各覓活路氏泣曰子亡媳去姑誰與養勤紡績以事姑撫子因過勞年四十八失明六十二卒

馬氏董珍妻年二十七夫故族人覬覦數椽屋欲奪其志氏卽移居以自保遇荒糠覈不飽卒撫二子各成生理

韓氏趙宣妻賈氏宣子盛美妻宣早亡韓截髮矢志茹藥撫孤洎美娶婦生子炳僅三歲而美又亡姑婦孤苦相依共撫遺孩

涇陽縣志卷八

三

初韓年十九居孀賈亦年十九而寡韓卒年八十賈現年六十俱少寡苦守先後同志也

何氏郭良玉妻年二十二夫故於江南氏奉雙親撫幼子歸葬夫柩子弱而病艱苦萬狀守節三十四年卒年五十六

趙氏謝三選妻年二十六選陣亡四川氏撫三子二女俱畢婚嫁守節三十六年卒年六十二

宋氏生員王謐妻年二十一謐歿遺子兆元甫彌月孤子無助甘窮守志撫子有成嘗汲井損臂忍痛無聲或問之曰婦人聲不出戶况寡婦乎守禮皆類此苦節三十七年

張氏進士士錦孫太學天績女爲卽用縣丞朱啟繼室年二十三啟謁選歿京邸聞訃痛絕念諸子女俱幼強食爲撫孤計前出子三色喜色正維襄自出國祚尚在襁褓俱一體教育喜入

庠早夭氏哀至嘔血正列成均亦早逝無子乃命撫姪爲嗣襄
早年入泮祚登丙辰賢書初啟之宦歿也親柩未舉氏竭力營
葬虔奉家祭敦睦親族恩恤僕婢親持家計以畢婚嫁尤尊師
教子故各成其名守節三十年現年五十二歲

門氏監生趙維均妻年二十二均故遺子毓秀方五歲家計窘
甚力作以事孀姑侍姑病暑不解帶者三月姑歿值歲歉跪懇
親族那湊備棺殮以紡紉所積續還之撫子有成守節三十年
現年五十二先是氏之曾祖姑劉氏爲丁卯舉人趙九成妻守
節五十年有孤燕巢堂之瑞姑梁氏爲候選縣丞趙凱繼妻守
節三十年有孤燕重來之異備志之以表其世節焉

傅氏儒生師班妻年十七歸班十九夫故絕粒三日以衆勸強
進食祖母與父勸令改適堅不從撫班弟珏子爲嗣孝奉翁姑
守節三十一年現年四十七歲

陳氏邱玉周妻年二十四夫客死無子絕粒欲殉因旁勸乃嚙
指瀝血矢志立嗣撫一族子殤又撫一服姪殤痛甚縊幾死後
撫堂姪良乃成嗣初氏夫弟玉積不慧勸以兄弟友愛及居孀
玉積不能理家氏爲人賃浣代紉自活乞鄰婦燈燭合績卒成
其志守節三十二年現年五十六歲

賈氏曹廷臣妻年二十八夫故無子撫從姪爲嗣生孫成室守
節二十九年現年五十七歲

姚氏趙鳴鶴妻年二十六夫歿肅州前已孤燈五年矣遺幼子
多病長患血症氏不忍其勞力作自任又先氏歿因姑老哭不
敢成聲初氏事孀姑窮必謀味姑患鬱症氏每指蜜導引侍疾
衣不解帶者三年守節二十七年現年五十二歲

郭氏儒生王節峻妻王氏峻弟儒生節峒妻峻客死蜀中郭年二十聞訃慟絕者屢矣母弟勸令更適乃斷髮自矢撫伯節煜子爲嗣教養切至得入庠序峒之亡王年方十七遺一女無子數自縊以救解節煜與子撫之事姑謹侍疾藥弗效必自禱祈代姑以漸愈又節峻兄節峻妾張氏嫡馮氏媵婢也納後舉一子峻夫婦相繼歿張年二十四或勸改嫁拒不應姑病痰氏寢臥於側候起居夜聞聲息卽起視撫嫡子三人與己子俱成第三子運入邑庠郭守節三十二年現年五十二王守節三十九年現年五十五張守節三十年現年五十四鄉里稱曰一門三節

鞏氏生員朱紹烈妻烈早逝氏年二十餘門鮮葑功績紉以奉繼姑自厭糟粕甘旨必潔脫珥訓子象賢入膠庠苦節三十餘年

牛氏鄧知本妻年二十五而寡躬勤機杼孝事祖舅姑與姑遺腹生子治撫之有成同居堂叔僅歲餘撫之授室生子妻早亡又乳哺其遺子鄉里匾以栢換松齡守節四十四年現年六十八

李氏王能恭繼妻乃前妻妹也年十六來歸二十三而寡撫前出子篤等三人備嘗荼苦至於成立守節三十一年現年五十二歲

任氏姚仲妻年十九歸仲二十一舉子夫病故慟不欲生翁姑抱其子勸之乃強食哀傷勞苦漸致憔悴父母憐之微言窺其志氏正色厲聲以自誓父母笑慰之令卒志教子成家終養翁姑父母老無子孝事三十年省視不稍懈

劉璉母全氏年二十八夫故家貧甚戚族逼嫁誓死以拒撫璉兄弟二人守節四十一年現年六十九

蒙氏姚琨妻年二十九夫死無子撫琨兄七月幼孩義德爲嗣斷箸自誓守節三十四年現年六十三

宋氏王璵妻年二十一夫死遺子大招方三歲大中僅八月家窘甚姑與父母勸改嫁不從事孀姑撫孤子後大招力穡勤家大中爲諸生守節三十六年

朱氏監生亢可觀妾年二十三可觀歿嫡朱氏憐其年少子又殤諭令改嫁氏顧三歲嫡子能敬泣曰大娘多病子幼妾去誰與共撫育豈妾賤輩不應守志耶嗣是斷葷衣布佩刀自衛勤苦操作佐朱氏事孀姑撫能敬授室成名守節三十餘年現年五十餘歲

王氏劉印賜妻年二十二夫故生子甫三月氏甘守寒薄紡績撫孤苦節三十八年現年六十歲

劉氏附監生劉溥妻溥客死江南氏年二十九終事衰姑撫子成立及長子琬歿妻鄧氏年甫十九念孀姑在堂不忍身殉相伴至死劉守節三十一年現年六十歲鄧守節十五年而卒亦無忝乃姑焉

李氏董漢儒妻年二十三夫歿遺子能健僅一歲苦志食貧教子爲儒守節三十二年現年五十四

何氏生員趙之庚妻年二十三庚歿遺子大輅方二歲大輅甫三日氏矢志撫育二子俱補弟子員守節現歷二十七年

高氏李喜聖妻年二十九夫歿先一月祖翁歿翁又繼歿三世連喪不堪痛苦姑又患眼疾氏乃賣奩延醫親侍湯藥不少怠

教兩子皆成至老不輟紉織連舉三喪盡畢婚娶稱完節焉守志四十二年現年七十一

張氏張光前妻年二十五夫故無子絕粒欲殉以姑勸強食父母欲嫁之以死自矢撫甥琚爲嗣終養姑子入監守節三十五年現年五十九

程氏曹琦妻年二十夫死姑年近八十忍死奉養惟勤織績鍼紉爲活計遇麥秋拾人遺穗指刺爛血淋淋不怨旨甘終姑之身撫一歲子併孤姪三人俱成立守節三十二年現年五十二
王氏韓本沛妻年二十而寡遺子甫一歲一子方在娠夫初死囑以他適求活氏啼哭不能應苦力撫孤族有憐而餽遺者堅不受曰恐爲後恥也二子俱畢婚娶守節三十九年現年六十六歲
王氏劉士偉妻年二十二夫亡督農理家以事翁姑遺子

初一歲撫之至生孫子後遠商不歸氏老安淡泊守節三十九年現年六十
趙氏趙天印妻年二十三夫亡氏矢志事翁姑撫子至授室又子媳俱亡孤子無依不悔所志守節四十九年現年七十六

趙氏馮時母年二十一夫歿家無斗筲惟力績紉抱甕灌蔬以自給撫子時至四十餘窮如故覓傭值以供母養母節子孝鄉里義之

張氏僑生何俊妻年二十一夫故撫前出子之福入監早亡又撫二孫守節三十年現年五十一

王氏李士義妻年二十一夫故家貧無伯叔兄弟之依解絲紡棉自給初依母家防人奪志後撫子成人還家授室今生三孫守節四十年現年六十一

韓氏幼許字里民董景景外出流落不歸氏年及笄念景父母老無依竟歸董力貧代養或傳景客死招魂制服誓不再適既送翁姑喪寄食叔嬸家族人爲立堂姪文顯爲嗣亦能孝養氏現年六十二

李氏岳生華妻年二十四而寡子九鼎才六歲撫之授室又早歿娶朱氏亦矢志撫孤治等三人李守節四十八年朱守節三十四年姑婦全以節著又韓氏岳生芝妻芝歿氏爲奉侍翁姑撫子九錫成立居孀三十八年雖守節在三十外貞行亦不可沒附於末

石氏王嘉志妻年二十四夫亡食貧事衰翁撫弱子守節三十八年現年六十二

王氏韓建勸妻年二十七夫亡無子誓以身殉念兩伯各遺一

子曰文光文炳孤幼無依懼其失所絕祀食貧撫育俱成立有家未幾文光夫婦繼亡炳妻亦喪氏仍孤苦自甘今守節三十六年

翟氏吳天壽妻年二十二夫病故一子方二歲一子尚在娠夫歿後始生氏力女工矢志撫育孝養翁姑每食常令二子外嬉不欲分旨甘守節四十五年現年六十有六

李氏掃文相妻年二十八夫故遺三子氏食素明志事翁姑撫幼子俱成立第三子元棟入庠守節三十餘年

馮氏劉士俊繼妻年二十四而寡撫前出子尊賢已子尊聖視如一體勤紡績以事翁姑賣產送其終不爲身計守節三十七年現年六十一

劉氏魚志妻年二十九志亡氏甘窮苦撫幼子守節三十四年

現年六十有三

熊氏怡溥妻年二十七夫亡有祖翁姑在三子俱少氏以女工代耕事老撫幼祖姑病噎不離左右祖姑不食氏亦不食守節三十三年現年六十歲

高氏劉秉貴妻年二十一夫故子鵬方二歲氏食貧撫育至於成人守節三十一年現年五十二

朱氏盧嚴妻年二十六嚴故氏身督耕手織紡撫三子全斌等俱完娶守節三十四年現年六十歲

張氏劉漢鼎妻夫亡氏年已三十撫子將成而歿撫姪孫爲嗣孫又殤兩伯與姪相繼逝與孀嫂寡姪婦共撫一弱孫老不易志守節三十二年現年六十二

身心交瘁婦道克終母儀無愧守節五十二年年七十有四

鄧煒妻張氏年二十二夫亡子生纔三月氏矢志上奉翁姑生死盡禮撫子之堪成立亦能孝守節五十七年現年七十有九呂氏姚緒唐妻年十八夫亡舅姑老遺子幼家赤貧勤紡績以仰事俯育守節三十年現年四十八

馬氏李鎮鼎妻年二十一夫病顧父母而泣氏曰爾父母卽我父母我決不負爾夫歿遺一襁褓子氏力作供旨甘姑嗜棗居近山地寒不宜樹手汲澆棗實纂纂後翁卒九十二姑終八十三子亦成立

馮氏鞏文灝妻年二十一夫故氏御窮自力養舅姑撫二子琅琚食饜糠粃不悔所志守節三十年現年五十二 李氏柴植妻年二十五夫故遺子方一歲拒議嫁者撫子成人守節四十

年現年六十有五 朱氏齊君孝妻夫死家貧竭力撫五子皆成後漸豐裕廣行施與雖守節在三十外艱貞亦可錄也

翟氏吉可奇妻年二十六夫故遺二女一子止有老姑氏甘窮侍奉後姑歿子女俱相繼亡屢值歲荒產業已盡歸依母家或勸改適幾至自殺遇祭則步拜吉氏塚族本孤姓因賣莊基買一子爲嗣守節三十四年現年已六十

李氏康宏緒妻年十七于歸甫兩月緒歿舅姑先逝依夫堂兄宏柱夫婦取從堂姪爲嗣二歲殤繼撫堂姪璐又十七年殤再以堂姪孫師華嗣焉恩勤教育以望其成守節三十二年現年四十九

苗氏周士俊妻年二十六夫故撫孤總晝就外傅夜則孤燈守讀長入庠事姑竭力歲荒剪髮易米姑臥病扶持三年衣不解帶歿擬殉葬以姪兩如救免調恤鄰寡白氏呂氏吳氏得成其節苦志四十餘年

張氏張善敏妻年二十八夫亡孝事孀姑撫族子爲嗣苦節三十餘年 張氏周相成妻年二十三夫亡遺腹生子撫至十八歲而殤族人憐之與子爲嗣守節三十五年

張氏楊玉梁妻年二十八夫亡勤紡績撫二子成人俱外出不歸又撫其孤孫守節四十三年現年七十 宋氏牛士信妻年二十六夫亡撫遺子三人力作爲活遇荒歉日食一糲子俱有成守節三十年現年五十 趙氏傅大濟妻年二十九夫亡身理莊農併女工撫遺孤守節三十二年現年六十

馬氏何徵仁妻年二十三夫亡孤苦無親兄欲奪志破面拒之撫幼子事衰親葬三世遺喪現年六十五 常氏徐文翼妻年

二十六夫歿江南氏事姑撫子備嘗荼苦卒昇夫柩歸葬守節五十年現年七十 白氏馬登貴妻年二十八夫亡撫三遺孤值歲歉伯氏逼嫁哭奔夫墓以免守節三十三年現年六十一翟氏陳之遵妻年二十八歲遵歿於蜀氏撫二幼子又相繼而殤氏益礪志勤苦族無總親畜異姓子爲嗣守節四十三年現年七十 楊氏郭騰蛟妻年二十一夫故遺腹生子苦志撫育事翁姑賣居屋送其終甘窮無悔現年五十有五 韓氏張際翠妻年二十四夫故家無擔石門鮮葺功氏甘冰蘖撫兩孤成立守節四十九年現年七十三 邢氏官醫王勉妻年二十四夫故遺二子方在襁褓氏矢志撫育經歷艱辛守節五十一年現年七十五 陳氏雷騰龍妻年二十餘夫故一子尚幼氏苦志撫育守節三十餘年現年六十歲

任氏師瑞妻年三十二瑞歿河南氏甘窮守志事老親撫幼子終身無怨雖守節在三十外然遺腹之子撫之有成苦節亦不可沒現年七十有六

侯氏岳瑁妻年二十八瑁客死於川遺二子俱弱氏矢志撫孤竭力養姑後以長子繼伯岳璘曰伯已老惟長者可以任勞我寧撫其幼者伯與長男又久客於外氏爲人鍼浣以終姑養積勞致疾而卒守節二十八年卒年五十六

宋氏李天昇妻年二十五夫病囑曰汝年少我死可改嫁得財禮養老父幼子則聽之氏泣曰妾在君母憂夫歿後勤績紡養衰翁喪葬如禮撫孤子成人授室食貧終身無悔守節四十七年現年七十一

雒氏王文學妻年二十七而寡姑以家貧氏幼諭令改適氏斷

髮立誓矢志不從姑病氏以米汁飼子以乳乳姑事姑盡禮
子成名苦節五十三年壽八十而終於乾隆六年

旨旌表賜銀建坊入節義祠

劉氏年十八蘇子麒妻年二十三夫亡氏當未出閨時卽能孝
事父母及適子麒夫婦相敬如賓子麒病氏侍疾一年湯藥必
親嘗乃進子麒歿氏欲以身殉家人力救得免惟食淡衣素簪
珥梁肉皆屏除不御事叔舅姑以孝聞叔舅姑歿子女數人皆
年幼氏善爲撫養衣食婚嫁皆氏一身料理里中咸以爲堂嫂
無異慈母云享年五十二苦節三十年於乾隆六年奉

旨旌表賜銀建坊入節義祠

刁氏李繩武妻年十四適李門越二年而寡且無子甘貧守志
上事舅姑下撫伯兄繩文所遺之子今年五十歲守志已三十

涇陽縣志卷八

甲

五年矣

吳氏王虞妻年十六適王門十九而寡夫亡無所出父母令其
改適氏嗚咽泣下曰我去舅姑誰事寧死不辱我志決矣以堂
姪王國元承嗣晝夜紡績撫育成入及子復有子氏欣然曰王
氏承祧有人我庶幾不負地下矣前任焦公匾額其門曰貞孝
軼倫享年六十八而終

岳氏張文瑋妻瑋歿氏年方二十子女無所出矢志守節奉姑
諸兄爲取姪淳嗣之迄今三十一年年五十一歲

章氏張廷助妻夫亡年方十九無所出父母令其改嫁氏斷髮
立誓矢志靡他且善和妯娌撫育姪子不啻己出守節三十餘
年如一日

毛氏王之偃妻夫歿氏年二十九遺子三氏立志撫孤誓不他

適子俱成立壽八十一而終 督學旌表其門曰古栢寒霜
孫氏監生王勉妻勉卒氏年二十三矢志守節奉翁姑終天年
撫前遺子恩鞠備極恩勤得以成立今已育孫矣現年六十有
五 督學旌之曰青松介石

姚氏王鳴九妻自十九歲守志食貧居賤歷盡艱辛子二今俱
成立現歷四十一年 督學表其門曰節甘茹荼
任氏董劼妻十七夫亡痛不欲生念親老子幼甘心守節姑多
病侍側無間寒暑姑歿後事鰥翁撫稚子無限勤苦而子至七
歲又亡或以無依勸改適氏叱之飲泣彌日翁擇一子繼之教
養如自己出現歷三十四年

成氏王述妻夫歿氏年三十立志撫二孤繼而長子死氏茹苦
教育次子得成立現歷四十八年 督學表其門曰勁節凌霜

李氏王典妻夫歿氏年二十無子痛哭氣絕者數次兩叔不忍
各舉一子爲嗣長世顯次世爵氏遂撫子守節壽七十六而終
督學旌表之曰勁節流芳

劉氏監生李生陽妻陽卒氏年三十遺子三封髮毀容誓不改
適弟婦卒並撫其姪俱成立現歷二十年南陽同知表其節
督學又旌之曰志潔冰壺

曹氏監生杜廷榷妻榷卒氏年二十七無子悲泣欲絕又無繼
嗣者氏愈悲痛取堂姪孫興元爲嗣現歷二十七年 督學旌
曰心如鍊石

杜氏生員朱色喜妻子衣娶媳楊氏係生員楊希震之妹素知
大義喜父子俱染病姑媳竭力奉事尋色喜歿越數年衣又卒
姑旣痛媳無夫媳又憐姑守寡有勸楊氏改適者氏引刀自刎

救得免姑語媳曰有媳若此朱門之幸也因取堂姪子雲爲嗣
姑媳相依者數十年於茲矣杜氏現歷三十七年楊氏現歷二
十四年 督學給匾曰兩世清風

怡氏生員劉珽妻夫歿氏年三十無子哀痛欲絕伯氏燠以子
繼之氏恩勤鞠育今已成立現歷三十六年 督學表其門曰
志堅金石

呂氏王學恭妻恭卒氏年三十一子文誥才四歲痛夫得子晚
而家又貧采藿拾薪艱苦備極教子成立以承王氏宗祧涼州
知府旌表之

魏氏鄧偉儒妻夫歿氏年二十五甘貧守志紡績以撫弱子年
四十七而終子今成立名永晟

蘇氏張思寬妻夫故氏年二十八矢志守節撫孤成立長興務

農次必捷中武舉選授山東登州守備氏年六十三而終苦節
三十五年

趙氏張思信妻夫故氏年二十三子三人長珙監生次懋官次
萬清俱武庠氏與思寬妻蘇氏俱係孀居妯娌各以貞節自勵
教子成名現歷四十三年鄉里以苦節雙貞贈之

徐氏生員怡振先妻夫亡氏年二十九姑老子幼矢志守節勤
女紅以奉甘旨姑歿喪葬盡禮教子有方授室生子廷相爲廩
膳生氏年六十而終苦節三十一年

宋氏故儒怡心浩妻二十四喪偶無子欲殉翁姑以次房孫廷
楷繼之氏事奉翁姑生養死葬教育繼子備極恩勤年六十一
而終宗黨贈言以表其節

件氏王肇慶妻夫亡氏年十九無子哀毀欲絕翁因取族孫爲

嗣氏矢志不移撫子成立卒年三十有八其弟念祖妻劉氏年二十三夫故氏懷娠得遺腹子亦撫孤守節年三十七而終張氏嚴宏貴妻夫歿氏年十九子二俱幼氏甘貧撫孤後倚分居伯父備極勞苦今子成立鄉黨重之

陳氏趙通儒妻年二十二而夫故無子取姪爲嗣堅心守節撫養成婚年五十四而終今有孫已七歲矣通儒有後姚氏張鏐妻三原姚成周女也未笄夫死氏素服歸張門父母從之里人壯其事因贈言以表之

喬氏雷琚妻二十八歲夫亡家貧無依痛不欲生因姑老子幼晝夜紡績上事下撫姑歿喪葬如禮子亦成立現歷三十五年王氏寇金榮妻二十歲夫故子才一歲家貧無度變賣衣物殯葬寇氏先靈數柩撫子成立現歷四十一年

崔氏楊起妻二十九歲夫亡痛哭絕食欲以身殉因孀姑年高遺子五月矢志守節現歷三十三年

王氏生員韓德肇妻夫亡氏年三十遺子八歲越七年又天苦無繼嗣氏封髮自矢紡織以奉翁姑生養死葬無不竭誠現歷四十二年

郭氏劉學詩妻二十八夫亡對天自誓寧死決不改適日夜紡績兼變衣飾以奉翁姑以育幼子現歷五十三年

馮氏王世業繼妻二十二歲夫亡時翁姑年老前出子二尚在襁褓氏晝夜紡織上奉雙親下撫二子後翁姑繼歿殯葬如禮二子賴以有成現歷四十六年

張氏張憲仁妻二十四歲夫亡遺二孤家貧無倚自咽糟糠而奉翁姑以甘旨專意仰事俯育迨後殯葬翁姑延師訓子均氏

一人拚擋現歷三十七年

于氏張莊椿妻夫亡氏年二十七痛哭失明甘心守志佐翁姑以維持家計歷盡艱難年八十四而終守節五十八年

朱氏經歷司朱霞妻二十歲夫故痛絕於地幾不欲生因子幼無依遂矢志撫孤家雖貧毫不爲意閉戶紡績課子卒年五十八守節三十七年

杜氏常在第妻二十九歲夫亡欲以身殉因親老子幼遂堅心事親撫孤及翁姑歿經營喪葬無不盡禮并且延師課子得以有成現歷四十一年

李氏薛漣妻二十九夫亡誓死以奉姑育子爲事姑多病服侍維謹而姑歿之日適荒歉之年氏脫簪典衣殯葬如禮現歷三十一年

王氏高尚友妻二十九夫故家道艱窘既無叔伯又鮮兄弟氏甘貧苦守訓子讀書卒年六十七守節三十九年

秦氏州同馬鵬徵妻二十歲夫故家貧無倚欲自盡子幼無撫育者因守節以終壽七十五苦歷四十七年

馬氏王謨妻二十一失偶或憐其年幼家貧勸令改適氏毀面自誓針指度日撫孤成立現歷四十九年

趙氏王訓妻二十八夫亡欲殉因孤兒無育不辭艱苦以撫養之現歷三十七年

劉氏仵明世妻二十二歲夫亡親老子幼隣婦憐之而以改適勸氏厲色堅拒對天自誓上事下育不遺餘力迨後殯葬翁姑延師課讀俱出女工壽七十一而終守節五十年

王氏謝賜經妻十八夫故無子號泣絕食因翁姑年老守節奉

親痛夫乏嗣禱祈房族餘丁以爲夫後現歷三十年

李氏生員馬廷秀妻二十九夫故甘窘迫以撫前出幼子雖終歲饑寒必令其子讀書苦節三十二年壽六十而終

李氏孟瑞妻二十八夫亡痛不欲生第雙親年老二子俱幼堅心守節以孝養撫育爲事翁姑繼歿盡哀盡禮現歷五十二年李氏程學閔妻夫素病氏事湯藥伺候起居閱十月而夫亡痛絕於地因夫以奉姑爲囑矢志自守上事繼嗣孀姑下撫前出幼子竭盡孝慈現歷三十三年

張氏監生翟基妻基卒氏方二十泣而欲死者數次家人力救得免又曲爲勸解遂堅心守節事翁姑以終天年撫前出子以成立苦歷三十二年

張氏故儒翟璽妻二十二夫故翁姑衰邁子在襁褓氏剪髮自

誓立志事親撫子始終不渝守節三十一年

張氏李作桐妻年三十三而寡翁老而多病步履必藉扶持氏隨時伺候未嘗廢離翁壽至八十三張氏調護之力俱多焉氏率二子殯葬一一如禮里人見之莫不動容

段氏王選妻二十七選及孀婦憐其貧勸改適卽斷指正色曰上有翁姑下有幼子仰事俯育吾責焉汝何出此言遂守節四十六年而卒

雒氏寇金容妻二十八夫故家極貧子女俱幼氏杜門紡績遇歲時虔祭祖先所生孤子長以承宗祀國盡艱難亦得成立現歷四十三年

王氏寇秉秀妻二十四夫亡悲痛絕粒因老姑諭以撫孤爲重遂矢志貞操其子今已成立而且抱孫矣現歷四十三年

邢氏孟昇隆妻二十二夫亡親老子幼貧無以爲養氏惟日勤針指孝養無缺迨後殯葬翁姑延師訓子均出女工年五十六而卒守節三十五年

劉氏張大緯妻二十二夫亡無子兼姑病勉力延醫焚香祝天願以身代姑病愈爲之擇嗣氏殷勤顧復不啻已出現歷三十九年

符氏王永斌妻二十四夫故家貧子幼辛苦備嘗迨授室生孫而子又亡氏哭子撫孫保全寡媳孤苦不堪情狀守節三十九年現年六十二歲

韓氏張凝袍妻二十二夫亡親老子幼家計艱難旣而翁姑歿親族有憐其貧而資助者氏俱婉言辭之一切喪葬盡出女工守節四十三年

李氏馬斯義妻二十而寡姑老乏嗣因撫姪爲子立志守節教子成名姑病則百般維持姑歿則一切盡禮現歷五十九年朱氏生員李裕妻二十二夫亡家貧無以供翁姑甘旨氏織紵奉親未嘗稍缺後相繼病歿悲痛欲絕不如葷者三年子稍長卽爲擇師訓課今已成立現歷四十六年

郭氏封大田妻二十五夫亡昏絕於地或以年少家貧微探其意氏痛哭曰吾不卽從夫地下者實因姑在堂而子在抱耳豈敢有他意耶隨剪髮自誓現歷五十年

杜氏張士傑妻二十二夫亡有勸其改適者氏厲聲呼斥嗣後不復交言隣人聞之莫不畏敬奉孀姑撫弱子苦歷四十五年現在詳請建坊旌表

趙氏劉德清妻二十六夫故哀毀欲絕有子方週立志撫之兼

撫孤姪視若親生現歷三十七年

蘇氏張湜妻二十二夫亡翁姑年邁子才週歲氏立志守節翁姑歿喪葬無資親族憐而助之氏力勤紡績一一清償不使翁姑抱憾地下現歷四十一年

鄧氏張珮妻二十夫亡上有老姑下遺幼子氏日勤女紅奉姑盡孝教子成名現歷三十八年

寇氏張全妻二十五夫故遺子五月隣婦勸其改嫁氏剪髮自矢守節食貧教子成立現歷四十八年

劉氏韓肇麒妻二十二夫亡遺子三月翁姑憫念家貧時對媳嗟歎氏窺其微嚙指出血以明之死靡他翁姑繼歿乏資殯葬將所住破屋數椽變賣以葬紡績食貧撫子成立苦節五十一年卒年七十二歲

王氏韓天賜妻二十八夫亡親老家貧子尚襁褓氏堅心守節養生送死撫孤成立備極艱辛現歷三十四年

何氏安洪武妻二十六夫亡上侍翁姑克盡孝道下撫弱子教以義方現歷四十七年

李氏張文傑妻二十四夫亡家貧惟紡績以奉老姑以育弱子常有見而憐之者氏謂非苦不成節烈有怨豈是堅貞矢志不移鄉里稱道現歷三十九年

劉氏李經倫妻二十五夫故立志與老姑同甘共苦竭力奉事以代子職下撫弱子曲盡恩勤迨後殯葬翁姑盡哀盡禮現歷五十二年

羅氏張正心妻十八夫故有子應鈴及長娶妻章氏年十七閱兩年而應鈴又故遺子甫及二月姑媳二人相依爲命一門雙

節閭里爭稱羅氏守節四十年卒年五十七章氏現歷三十二年

丁氏趙永剛妻二十四夫亡僅一子孤苦無倚氏立志守節孝養孀姑教子成名現歷三十二年

陳氏王金城妻于歸四年夫故青年守志代夫養親甘貧訓子現歷三十八年

李氏李宏毅妻年二十一夫亡竭力事姑愛敬兼致並能勉勵其妾張氏共守堅貞撫孤成立閭里稱爲一門雙節苦志四十年亡年六十歲

王氏李貞妻二十六夫亡上事老姑下撫弱子婦道母儀一身兼備現歷三十八年

袁氏張雲翼妻二十七夫亡翁姑因念家貧惟恐媳不能守相爲唏噓氏默喻其意剪髮自矢現歷三十八年

許氏白佑浩妻十九夫亡孝養翁姑甘旨無缺並能訓子成立以嗣宗祧苦節三十二年卒年五十歲

王氏生員張棟妻二十四夫亡家甚貧菽水不給氏竭力操作以奉翁姑子稍長就學無資每親自訓課不遺餘力現歷三十九年

韓氏許秉鈞妻二十歲夫亡無子有強其改適者氏截髮自誓甘貧苦節事祖姑及翁姑盡禮無懈以姪爲嗣無異已出現歷二十八年

王氏宋大有妻十八歲夫故族人屢逼改嫁氏引刀欲刎撫襁褓子哭曰宋氏一門惟此而已吾死子亦死嗣不絕乎因食貧守節撫孤成立現歷三十二年

張氏趙涵妻二十三歲夫亡遺子一舅姑早逝祖翁姑在堂氏仰事俯育克盡婦職現歷三十五年

唐氏盧瑚妻二十九歲夫亡無子欲殉伯氏以子嗣之氏鞠育如已出守節四十年

盧氏焦居榮妻二十八歲夫亡痛不欲生因孀姑年高三子俱幼勉爲食息值歲歉日勤紡織以給日用鄉里稱爲女中丈夫現歷四十三年

劉氏吳士宗妻二十六歲夫故氏糟糠自咽孀姑弱子奉養無缺兼變衣飾殯葬數椁鄉鄰聞見者咸敬服焉

以上節婦七十五人俱有事實可紀而邀 學使獎賞者不一過八九人其餘均未能上請 旌表亦缺典也

王氏韓建勳妻于歸未久夫亡不克逮事舅姑遇祭必誠必敬

出盡婦職兩姪幼孤氏教養之無異已出乾隆十五年 旌表

聶氏趙鵬翼妻夫歿子幼孤子無助貞操自勵勤女紅教弱子屢遭歉歲甘心食貧乾隆十七年 旌表

牛氏鄧知本妻夫歿氏懷服哀痛絕粒老姑以宗嗣諭勸勉進飲食斷髮自勵數月後果產一兒孝奉孀姑養育幼子守節數十年如一日乾隆十八年 旌表

馮氏鞏文灝妻夫亡卽欲自盡因翁姑在堂子甫週歲堅心守節毀面自矢奉舅姑終天年撫孤子得成立乾隆十九年 旌表

王氏張紹統妻夫歿家貧無以供老姑甘旨氏日夜操作備歷

辛勤旣奉孀姑兼撫幼子苦志守節者數十年乾隆十九年

旌表

張氏吳續德妻夫亡後翁姑多病脫珥延醫竭立調護二十餘載無倦容其於孤子則撫以慈教以義吳氏子得以成立不墜宗祧張氏力焉乾隆十九年 旌表

吳氏馮自新妻夫歿家窶甚斷髮自勵日夜紡績上奉垂髫之雙親下撫彌月之孤子辛苦艱難於氏爲極乾隆十九年 旌表

李氏徐生輝妻夫客死子尚襁褓氏聞訃絕食翁姑以大義勸諭隨堅心守節撫孤稍長命扶父柩旋里安葬乾隆二十一年 旌表

韓氏生員熊彥妻夫歿二子俱幼家雖貧而孝奉孀姑甘旨無缺後長子維男任安化令次子維中監生且以見氏之教子成名也乾隆二十二年 旌表

程氏強元紹妻翁姑在堂子甫一歲夫故仰事俯育迨後殯葬舅姑並先靈一十二柩俱氏艱苦經營乾隆二十二年 旌表

段氏王天學妻夫亡哀痛欲絕因夫以奉姑撫子爲囑遂毀面自誓堅心守節乾隆二十四年 旌表

張氏業儒王宗孔妻夫亡子甫三月氏立志奉姑撫子王氏一脉賴以不墜乾隆二十六年 旌表

鞏氏苗大年妻夫亡無孝養翁姑者氏勤苦操作以供饔飧迨翁姑歿喪葬盡禮矢志不移乾隆二十六年給匾 旌獎

李氏生員高枝妻夫亡子甫週歲翁與繼姑俱臥病不起氏侍奉湯藥者三年毫無懈怠翁姑歿哀禮交盡歉歲糟糠自咽教子成立乾隆二十七年 旌表

李氏監生張呈瑞妻生二子夫客四川死於旅邸氏聞訃投環

隣婦解救因繼姑以兩子囑托堅心守節養育無倦容後命子扶柩回里哭拜氣絕復行救醒乾隆二十七年 旌表

蕭氏生員張大恒妻夫亡姑老子幼生無以養死無以葬氏竭力操作孀姑弱子均賴以全夫柩亦得以殯乾隆二十七年 旌表

陳氏張祖良妻子歸後姑病在牀竭誠侍奉姑未愈而夫先亡為典簪珥醫姑葬夫子鏤三月背父氏事姑撫孤備嘗辛苦鏤稍長氏織子讀機聲書聲晝夜不徹鏤以成名乾隆二十八年 旌表

王氏劉佇影妻夫亡姑又病暗祝蒼天願減年以增姑算姑病遂愈事親撫孤歷盡艱苦乾隆二十九年 旌表

涇陽縣志卷八

五

無依氏毅然以養親育子為己任守節不渝乾隆二十九年 旌表

陳氏生員李倫妻夫病篤因氏年幼探其意氏泣曰妾亦人耳何遽不能守志遂封髮自誓苦節終身乾隆三十年 旌表

汪氏王偉妻夫歿姑老家貧氏紡績奉養姑歿無力殯葬掘地數尺負土成墳乾隆三十年 旌表

劉氏王天相妻夫亡勤紡績以奉姑甘旨自咽糠粃嚴冬苦無薪火每夜以身煖姑姑歿喪葬循禮撫二孤俱入太學乾隆三十一年 旌表

何氏呂應夢妻子歸後家貧姑老夫傭工奉母氏典賣首飾以佐不逮及夫亡劃面斷髮甘心養老育遺姑病歿醫藥喪葬無不竭誠盡禮子亦成人乾隆三十三年 旌表

韓氏苗浩妻夫亡姑老子幼矢志事親育遺姑全天年子得成立鞏氏維持之力不鮮乾隆三十四年 旌表

維氏賈永清妻家貧夫與姑繼歿痛哭絕地有死無生忽聞幼子哀啼遂矢志撫孤成立以承賈祀乾隆三十五年 旌表

張氏監生門生蘭妻夫歿悲痛不止殮後欲自縊聞姑喘子啼轉念曰捐軀以求自全其奈姑老子幼何遂堅心守節奉姑撫

子始終不渝乾隆三十五年 旌表

張氏李瑛妻夫亡翁姑老而多病醫藥祈禱備極周章及翁姑歿喪葬如禮延師教子苦節終身乾隆三十五年 旌表

張氏門及第妻夫客死痛絕於地轉念姑老侍奉無人遂斷髮守志取族姪爲嗣教養成就乾隆三十五年 旌表

茹氏寇長春妻夫亡上奉孀姑下撫二子備極恩勤今二子已

成名矣長學會歲貢次學閔監生乾隆三十七年 旌表

張氏生員高文傑妻夫亡姑痛子夭病且歿氏哀毀欲絕衣棺殯殮均克盡禮守志撫孤歷數十年乾隆三十九年 旌表

謝氏姚君臣妻夫亡剪髮毀面以事翁姑撫幼子爲己任及翁姑繼歿經營喪葬又復延師教子家雖貧事俱楚楚也乾隆三

十九年 旌表

朱氏李得福妻夫亡家貧無以自給或憐之而勸令改適氏跪哭自誓以明不二日勤紡績事奉孀姑撫孤成立乾隆四十一

年 旌表

烈婦李氏劉廣妻惡棍李金昇欲污之氏不從且引刀自割因救得不死旋復投環殞命節烈之氣凜凜如生乾隆三十七年

旌表

孝婦吳氏孝子熊鈞妻鈞買易成都氏紡織奉姑姑病篤寄書招夫夫未歸而姑已逝痛哭絕地衣棺盡禮夫歸安葬廬墓氏負土成墳乾隆三十年 旌表

王氏熊偉妻十六于歸廿三夫故姑老子幼加以赤貧日夜紡績上奉孀姑下撫孤子艱苦備嘗守節四十二年終年六十五歲

李氏生員陳尹澤妻十七于歸廿一喪偶家貧子幼斷髮守貞典簪珥以葬親勤織紡以撫子備嘗辛苦教子成名守節三十五年卒年五十四歲

申氏魏振邦妻二十于歸三十夫歿仰事俯育盡出女工殯葬翁姑盡哀盡禮苦節三十一年現年六十一歲

楊氏趙琦妻十九于歸廿一夫故姑老子幼矢志守貞姑疾親嘗湯藥無間晨昏撫子成立教以義方家雖赤貧清操彌勁守節四十七年卒年六十七歲

涇陽縣志卷八

七

呂氏監生李朝瞻妻十七于歸十九喪偶家貧如洗日勵女紅上奉翁姑下撫前妻之子皆氏一身負荷苦節五十三年現年七十一歲

焦氏何煒妻十八于歸廿三夫故翁姑早喪兼乏子嗣晝夜紡績奉事夫祖父母克盡孝養並取族姪爲嗣撫育無異所生今已成立守節四十八年終年七十一歲

孟氏杜大勳妻十七于歸廿二失偶姑老子幼家業蕭條自甘粗糲奉姑甘旨不使少缺堅心守節教子成名苦節四十二年終年六十二歲

蒙氏張倫乾妻十八于歸廿九夫歿家貧無倚矢志守節姑病

藥醫罔效泣禱於天願以身代及歿哀禮兼盡一切喪葬之費皆十指所積擇師課子今已成名守節四十二年終年七十一歲

張氏王君寵妻十四于歸廿四喪偶翁姑年邁遺子方週日課女紅仰事俯育艱苦備嘗親歿喪葬盡禮教子今已成立守節四十九年現年七十三歲

李氏韓起龍妻十九于歸廿五夫亡家貧子幼翁姑多病晨昏侍奉久而弗懈及歿喪葬盡哀盡禮守節五十年終年七十四歲

魏氏劉起妻十九于歸廿五喪偶姑老家貧兼無子嗣或勸改適剪髮自明撫取堂姪立繼紡績攻讀今已成名守節三十年現年五十五歲

韋氏李爾文妻十八于歸廿八夫故親老子幼家計蕭條日事女紅奉親克孝親歿喪葬盡禮辛勤教子今已成名守節四十年現年六十六歲

王氏洋縣訓導熊鈺妻十八于歸廿七喪偶家貧無子翁姑年邁堅心守節上奉甘旨自勉糟糠辛苦備嘗毫無怨意守節三十二年卒年六十歲

師氏梁自有妻十八于歸廿六夫歿姑老子幼家業赤貧晝夜織紵奉養無缺姑病親嘗湯藥及歿殯葬盡禮苦節四十八年現年七十四歲

賈氏監生張我紀繼妻十八于歸廿六夫故舅姑衰老子在襁褓剪髮明心茹荼矢志孝事翁姑以終年撫育遺孤以成立守節三十二年現年五十六歲

李氏王雲從妻十八于歸廿三夫故姑老子幼勉持大義堅守未幾子又夭亡擇取姪孫爲子繼嗣哭子撫孫備嘗辛苦守節三十九年現年六十一歲

魚氏王璠妻十七于歸廿六夫歿家極艱難惟賴紡績辛勤度日教子今已成名苦節四十四年終年七十歲

杜氏王繡妻十八于歸廿五喪偶姑老子幼家道極貧力勤紡織以盡孝慈忍飢寒而營喪葬苦節三十七年現年六十二歲張氏監生崔獻麟妻十八于歸二十夫歿家貧無子撫姪爲嗣侍奉孀姑克全孝道守節三十二年現年五十一歲

侯朱氏侯福朝妻十七于歸廿七夫故棲身何所傷哉破屋半間矢志靡他藐爾遺孤週歲現在撫子成立守節已三十一年張氏監生維廷亮妻十七于歸廿八夫故姑老子幼兼係赤貧

日夜紡績孝養無虧教子成人劬勞良苦守節三十五年現年六十二歲

張氏趙景奎妻十九于歸廿二喪偶毀容絕食痛不欲生因念親老家貧嗣孫尚幼勉延殘喘以供衰老之餘年心切撫孤以繼良人之嗣祚守節五十九年卒年七十六歲

維氏周均懋妻十五于歸十八夫故姑老子幼度日維艱隣婦有勸以改圖者卽正言呼斥終身不與交言閭里莫不敬畏守節四十四年現年六十二歲

王氏趙倉妻十五于歸廿二失偶家貧子幼姑老失明紡織食貧孝慈彌篤苦節四十四年現年六十四歲

王氏張天儀妻十九于歸二十夫故毀容自誓堅心守節痛夫無後撫姪爲子教養成名備嘗辛苦卒年五十七歲苦節三十

七年

楊氏韓重璧妻十四于歸廿八喪偶身懷六甲越數月而生子日勉女工上奉雙親以終年下撫遺腹而成立守節四十年現年六十八歲

王氏徐應龍妻十八于歸二十夫故家貧翁老兼無子嗣取胞姪爲子恩勤撫育無異所生仰事俯畜惟賴女工苦節三十三年現年五十三歲

王氏蒙大德妻十六于歸廿八喪偶家貧子幼翁姑俱老立志守節日夜紡績教子成立孝養高年存沒盡禮守節五十六年現年八十四歲

義婦任氏已故候選州同王天桂繼妻懷清守潔慕義善施乾隆十五年捐修義倉貯麥一百五十餘石接濟閭村至今賴之

乾隆十八年重修村堡週圍墻垣望樓費銀六百七十餘兩又自乾隆十一年起積年代閭里完糧約共七百餘金每遇飢年散糧接濟不計其數凡存借約或壁或焚約有二千餘金他若資助婚喪澤及枯骨修橋梁卹孤寡種種義舉里黨尤稱頌焉

方技

明

王春陽學醫有解悟診脉用藥皆世醫意所不及

張碧山精於八法神針能起痲癱了凡袁先生習術於其門

柴定向字少池善識風水能於數十里之外望地氣而知休咎嘗過學宮見育才坊廢請於縣令曰此坊復建必科第蔚興次年丙子果中鄉榜十人爲役初太學士王中伯公卜地其山峰峻拔占者以爲不利向曰此將軍山也當有以武成名者

驗年九十七歲髮色如童遠近稱爲地仙云

徐青萍學琴於吳門其後遍遊天下名頗著焉

梁時元善畫山水得沈石田筆意

強應祥生員性豪放喜遊覽以繪事知名

劉源字侗菴生員性簡傲不羈甘貧守約以繪事自娛

仙釋

宋

張夢乾字天遊孟店鎮人家素封老而好道有脫塵離俗之志
遇劉海蟾授以仙術遂賦詩曰這回脫穎出塵寰雲水逍遙任
自然寧作無爲閒白日肯教有路走黃泉壺中深隱長春景物
外潛藏不夜天莫道神仙難際會分明相遇復相捐一日辭村
落人曰遲十日中午吾將飛去衆以爲狂及期登槐杪吐沫斗

涇陽縣志卷八

七

餘猶舐之相隨狎舉涇陽商人卽於是日午見夢乾於雲南片
晷而騰躍萬里亦奇矣哉

利市先生白道元峪口人以其貌古質厚肩背隆然俗呼爲井
轂轆生而七歲不能言及長馬丹陽遇於途次與語若合宿契
遂傳真訣蹈水如履平地日行千里脚下無跡嘗自歌曰橫順
四條椽在世八十年若要跟尋我直至白骨邊後果八十無疾
而卒旣而舉葬棺空無尸旬日人見先生在白骨寺邊往來方
驗在生所歌之言真神仙也

元

徐真人按雲陽志真人戒行精嚴祈禱有應勅賜清淨體道號
靈真人

袁思義按雲陽志太師明道德莊列等書兼通佛教及醫術陰

陽卜筮之學有著術道德經莊列等書引證馬丹陽孫也二洞講經賜紫金襴

隋

普安俗姓郭氏本縣人投藹法師通明三藏常業華嚴於子午虎林兩谷合澗之側鑿龕結庵有大石崩下安默念曰願移餘處莫碎龕窟石遂依言迸避餘所龕東有素陁者欲害安同伴三人發矢矢不離弦張目閉舌立經宿又龕西有張暉者夜竊佛油負笈而出迷昏失性若有所縛不能動又龕南有張卿者來盜安錢持去袖中達家不得出口噤無言安各令懺悔方解脫皆華嚴力也程郭村程暉和恒來安所聽法病死兩宿安至其村喚之和身遂動入其庭大喚之和卽偃起安覆一篋笈以當佛座令和遶旋尋復如故白村一母病臥百日乞救於安安至母卽下迎言問起居奄同常日遂失病所在龕側村中縛猪三頭將烹宰安聞往贖索價不足忽有小兒裹腹而至助安贖猪須臾不知所在安卽引刀自割胠肉曰此彼俱肉耳猪食糞穢爾敵之况人食米理足貴也村人聞之感動一時有猪者皆釋放

元

蘭公和尚嫻儒經有才力巧於射藝金元間大變賊遍起蘭公以射藝救人者衆出雲陽志

明

圓相俗姓牛氏本縣東關人號普濟遊巴蜀十餘年聞關內大饑期一見母杖錫東歸往邑之惠果寺母雙目久失明圓相晨昏懺悔以舌舐之一日自外歸省以所著僧帽卸持於手母驚

問曰和尚遠來頭汗未消何遽脫帽耶圓相復著之以試母曰
如此得之圓相欣躍如狂嘗置小車母欲適親故卽獨拽以往
事竣復載歸歲以爲常穿義井百餘改創天王地藏等殿
悟緣字萬休本縣人剃度江南爲雪浪門人後遊京師住圓通
庵神廟間奉李太后懿旨護藏西歸開講文塔寺

